

rocha a pati, perchè ogni summa di danari che si spende, non pol esser più la spesa che anderà a prenderla, *maxime* convenendo poi rifarla. In dita rocha, per quello si dice, sono 200 fanti; capetano missier Andrea Letistem, homo valentissimo et di bon nome. Jo son per afaticharmi, quanto potrò, di far acordo, perchè io la reputo fortissima et non cussi presta da prender; per ogni bon rispetto è bono l'acordo e presteza. Se farà el tutto, quando el proveditor dovesse pagar dil suo ogni summa di danari. Ne la terra era capitano domino Zuan Ausperger, capitano di Lubiana, homo disposto et, per fama, gran richo. Questa è stata una bellissima impresa, *maxime* con la pocha quantità di zente se trovavamo; et credi che la non è cossa da restituir, per esser locho di gran importantia et in bellissimo sito. Dio ne doni gratia, che habiamo la rocha presto, a zìo si habbi causa di fortificarla et restaurar el roto, che sarà molto a preposito de la illustrissima Signoria. Dogliomi *solum* de una cossa, che 'l magnifico proveditor non habi posuto veder con l'ochio questa gloriosa impresa, como per relation hala sentita; che invero io ho visto tanto apasionato trovarsi in leto, per non poterssi exercitar, como era el desiderio suo, che dubito, se non veniva questa bona nova, el suo malè era per esser più longo di quello bisognava; ma spero che questa vittoria sarà stà la sua medicina, che li darà la sanitate. Io son restato in Goricia volentiera, per devedar non se meti a sacho, et per far quello mi è stà comandato et per el signor proveditor et governador. Quello seguirà del castello, doman te lo farò asaper.

Letera dil dito, 18 april 1508.

Frater carissime.

Per dirti el successo del castello, sapi che tutto eri si stete im praticha di acordo, et ozi si ha continuato, talmente che se ha concluso in questo modo: zoè che per tuto venire, a hore 28, zoè a di 21, se 'l non li vien soccorso, che possi cazar el nostro campo di la terra, sabato da matina el castelo ne sia dato ne le mane, con tute le munition del dito castello, exeto che sia riservato al capitano, missier Andrea, tutto l'aver suo et de li soi soldati, accompagnati fino in locho sicuro. Si certo che questo termine parerà longo, et più a nuj che semo sul fato; ma meglio è stato cussi, sperando non sia per venir soccorso alcuno; et poi, quando se avesse comenzato a trazer, non credo el se haria hauta in 4 nè 5 zorni; et poi se haria convenuto star con lo exercito

in Goricia, per fina che se fosse restaurato dito castello per segurtà sua; però s'è acetato l'acordo. Et azò non si maravegli la causa di questo tempo, è che 'l capitano è homo da conto e di gran coraggio, et li par salvar l'honor suo tenendose questo tempo, non venendo soccorso, come lui dice non lo sperar. *Tamen* se ha piantato le artilarie a loco suo dentro de la terra, im perfetissimo locho per offender el castello; et l'horo mai hannotrato, che è stato bon segno che l'acordo habi locho. El capitano non ha mai voluto atender a partito li sia stà fato di danari; ma l'acordo è stà tratato per doi spagnoli, homeni da conto, se trovano in castello, con i quali si ha composto di darli ducati 4000 in contadi per poliza di banco. Questo se ha fato per averli dentro benivoli, et che siano causa la rocha se doni per aver la imbochada, *maxime* che sono homeni de extimation a presso questò capitano, et sono stà boni instrumenti di tal acordo. Se atenderà a le promesse, qual se harano a mandar per la Signoria nostra. El magnifico proveditor è pur alquanto resentito, *tamen*, per la bona nova, doman si farà portar in Goricia per risetar molte cosse, cussi di la terra come di le fantarie e zente d'arme etc. El vien de li missier Zuan Cotta, canzelier dil signor Bortholamio, qual è zentil persona e homo doto, e vien a questo effecto di la partida con li noneij dil castello; tuolo in casa etc.

*Letera di 19 april 1508, dil dito,
in Gradischa, hore 24.*

Frater carissime.

Ozi non è innovato cossa alcuna, ma si stà in aspectatione che 'l passi venire da sera, per veder la resolutione di la rocha. Et per esser il magnifico proveditor amalato, mi bisogna far l'oficio in sollicitar le cosse necessarie, che per mia fe' è gran fastidio a contentar tanti stranij cerveli, *maxime* in fanti, che, chi li porta im pacientia, credo Dio li admeta a gran indulgentia de li soi peccati; perchè in una horra voleno danari, altrimenti non se voleno levar, e bisogna, horra con bone parole, hora con triste, scorderli; e fu bisogno, in quella horra che se doveva andar a la bataglia, andar in campo et darli danari a description senza risegna. Ogni di ne scampano, nè giova farli apichar et esser feriti per il signor Bortolo; ma ognora fugano, che credo fin horra non siano 1200. Molti non hanno voluto tochar danari, compito el suo mexe, quali non se hanno potuto tenir per forza. L'è gionto la paga a le zente d'arme,